

OLA

PULETINI A'OGA

e faasoa faamatalaga mo a'oga i le gagana Samoa

www.ola888.com

Ripoti o le Vaiaso: Fanau ma ma'i o le mafaufau

Lipoti ta'utino A'oga Amata

Faasoa o le Vaiaso: E tatau ona lagonaina le valaau a le fanau

Laufatu Samoa: O le peleti o Alifi (tala faasolo)

23 IULAI 2018 ~ Lomiga 20 ~ Upega Tafailagi: www.ola888.com ~ Telefoni (03) 382 6674 ~ Tuatusi: ola.niupac@gmail.com; ~ evaleon.books@gmail.com ~ E le faatauina ~ A Free Publication

otootoga

E tele ni suiga ua tula'i mai i le lotoifale o le iunivesite a Aukilani talu ona tula'i mai Stuart McCutcheon. E iai le vaega o se vaega o le afaigaluega a o loo mana'omia i latou ona o le siitaga o le aofa'i o tamaiti aoga. Na mafua ai ona tusi atu le TEU i le alii taiulu e faamanino lana mafuaaga. E talitonu le TEU ua tatau ona talanoaina lenei ta'ita'i ma ana faaiuga.

Ua tofia le alii o Te Ururoa Flavell i le tulaga o le pule faatonu o le Te Wanaga o Aotearoa. Na viia e le ta'ita'ifono le tofiga o Flavell i lona potomasani i le ta'ita'iga o faalapotopotoga, o le a saga faaleleia ai ona sini ma fuafuaga auiluma. O Flavell sa avea ma soata'ita'i o le vaega faaupufai a Maori.

Ua poloa'iina pulega o a'oga teseri (tertiary) e faatumu le ava i le va o fanau Maori ma Pasefika ma isi i le tulaga o ausiga. Pe a ma le 20 pasene le va o i latou ma isi i le Fola lona 7, saunoa se sui o le komisi (TEC). Afai e siliga, e au ina le toe maua le faatupega o loo totogi atu i ai i tausaga ta'itasi.

Ua saina se feagaiga i le va o se kamupani gaosi vailaau ma le AUT (Aukilani) e su'esu'e ai le fa'aogaga o le mariuana i togafiti faafomai. Ua iai le faamoemoe e lagolagoina e le su'esu'ega ni aoga faavailaau mo nisi o gasegase e fetui i ai. E tusa ma se 400,000 kiui e ulaina le mariuana e ui ina faasa e le tulafono.

E lagolagoina e le to'atele o faia'oga le te'ena o le ofo a le malo i le isi taamilosaga o feutagaiga i le va ma iuni i totogi. Na manino i taimi o fonotaga a iuni le sauni o nisi e tuua le faiva pe afai e le suia le ofo i se pasene e sili atu. E to'atele o loo finau pea mo le 16 pasene sa ulua'i talosagaina.

E fitu ni a'oga fou ua pasia lo latou fauina i totonu o Aukilani i le isi tolu tausaga. O loo ua molimauina le televave o le Faatupula'ia o fanau e ulufale i le a'oga. E fuafua lea i le masi'i a'e o le faitau aofa'i o e fananau ma e malaga mai fafo. E 12 isi o loo fuafua e mae'a i le 2030. O lenei faaopoopoga o fale o le a fesoasoani i le fe'oma'i o loo molimauina i lenei taimi.



VAITAU O MATARIKI: O loo tatou iai i le vaitau o Matariki. O le taimi tonu lenei e iloga ai le pupula a fetu e fitu, lea e iloa i le ta'u o le koluse i saute, ae faaigoa e nuu Europa o le uso teine e to'afitu. Ae faaigoa e Maori o le Matariki (tama'i mata, poo fofoga o le Atua). O lea e faitau ai le amataga o le tausaga faaMaori. O la latou mau, a malosi tele le pupula o fetu o se faailoga lelei lea, o le a mafanafana le tau ma fua tele mai faato'aga. E le tasi se talatuu a Maori i le Matariki, e iai lena ia Matariki le tina ma lana fanau e to'aono na malaga e asi lo latou tupuga o Papatuanuku.

Polofesa Lagolago Aiono Dr Ekeroma

O se tasi o tala e fagaina ai le agaga lotonuu Samoa o lena i le alii fomai ia Dr Alec Ekeroma pe faapea foi o le afioga ia Aiono.

Ua tofia nei Aiono e avea ma polofesa lagolago (associate) i le iunivesite a Aukilani i le motu i matu.

O le tausaga ua mavae na mae'a ai lana su'esu'ega mo le tikeri o le foma'i.

O lana mataupu o lena i tamaitai ma o latou gasegase. E aofia ai i le su'esu'ega ma'itaga afuafua, e malamalama lelei ai i lea laasaga taua o le tina.

O nisi o gasegase tautina o loo saili pea ni fofo ae faale to'atele ni Samoa poo ni Pasefika e atamamai ai.

O le tofia o Ekeroma i se tulaga taualoa i totonu o se a'oga e pei o Aukilani e taua tele mo Samoa. Talu ai o se vaega o ana su'esu'ega sa aafia ai Samoa; e le pine o le a maua ai se manino atili i gasegase o loo aafia ai a tatou tina ma tama'ita'i.

O lona sao i malo o se faaa'oa'o lelei mo



le fanau, o le fe'au e mafai foi e i latou ona ausia lea maualuga.

Ua tele a tatou foma'i i le tino, e vaايا le ola maloloina, ae o loo mana'omia pea ni foma'i faapitoa e pei o le tomai lea o loo i le susuga ia Ekeroma. O se fe'au foi o le leai o se tua'oi o le matua e toe foi ai i le a'oga.

O le afioga ia Aiono sa tautua mo Samoa a o lei malaga mai ma galue iinei ma tonu ai e toe saili tomai i le a'oga.

O ia foi o le faatonu o le Pacific Health Dialogue. Sa faamamaluina foi e le asosi a Foma'i Pasefika i se faailoga, i lana tautua, i le tausaga na se'i tuana'i.

Ripoti o le Vaiaso:

Mauualuga numera o fanau aafia i ma'i o le mafaufau

E 56 pasene o fanau a'oga i a'oga tesiani (tertiary) e aafia i ni mataupu tau le mafaufau, ua avea ma ni faalavelave i o latou taumafai taua'oga.

O le faaiuga lea mai se sailiga sa faia i lenei mataupu, mo le taimi muamua.

E tusa i le sailiga, e o faatasi le lagona o le faagae'etia, le tuga o se ma'i taule mafaufau o loo tauave, ma le musu i le le pasi; o mea uma na e gaoioi faatasi ma fauina a'e se pa pupuni mo le to'atele.

I le taimi o le su'esu'ega, na faailoa le lagona o le to'atele o i latou e fa'amaamulu mai le a'oga.

O lenei faaiuga a le su'esu'ega ua laga ai se mataupu taua i le tulaga o le ola maloloina o fanau a'oga. E lagolagoina foi le tulaga mauualuga o Niu Sila i ma'i taulemafauafau e aafia ai ana tupulaga tainane le atunuu lautele.

Saunoa Jonathan Gee, peresitene o le asosi a iuni a'oga a Niu Sila, o le a aoga le su'esu'ega lenei e iloaitino ai le faapogai o nei mataupu ma ona aafiaga e tula'i mai ai.

Faaalia se finagalo o Gee e faapea, o le tula'i mai o nei aafiaga taule

mafauafau atoa ma ma'i e tutupu mai ai, o ni faailoga o le taimi ma suiga.

Talu ai o se si'osi'omaga ua liua i le agaga faatautavā, ua omia ai le fanau a'oga i lagona eseese o le popole ma le atuatuvaile, le le mautonu.

E mafua ai ona to'omaga nisi i le 'ava malosia pe faaoga sese vaila'au mai foma'i; pe iu lava ina tagofia vaila'au faasāina.

Saunoa pea Gee, ua le toe maua e fanau le lagolago sa iai. E foliga ua galo i iunivesite ma politeki o latou tiute i le atina'e o tagata ma nuu. Mo le to'atele o fanau ua avea le iunivesite ma se nofoaga e na ona ui atu ai ae le o se taulaga o faamoemoega manuia.

E fa ni mea e ao ona sui saunoa pea Gee. Muamua, o le faaofia o lenei i talanoaga, ia amata vave mai i kolisi ma a'oga mauualuluga.

Lua, laga se talanoaga e aofia uma ai le atunuu. I lena e ta'u atu ai i le fanau



Ua faamaonia se aafiaga malosia o fanau Pasefika i ma'i o le mafaufau i si'omaga a'oga

mafatia e le na'o latou, o iai le lagolago a matua ma le atunuu lautele.

Tolu, tulimata'i i latou na mai faiganuu laiti o loo iloga le lamatia.

Ma lona fa, faaopopo le faatupega o tautua ma alaga'oa e lagolago ai galuega a foma'i ma faalapotopotoga.

E lagolagoina le su'esu'ega e isi foi sailiga, e iai se tasi mai le iunivesite a Otako (Otago); e maua i ai se ta'i 10 tausaga e aafia ai foi.

Ua iloa i su'esu'ega le malosia o auga o ma'i taulemafauafau i le tapulaa tolu e faatusatusa i kolisi ma le tapulaa amata, ae le atoa a'i, e pei ona molimau le sailiga

Fola i lumamea lisi o tagi ta'u ai A'oga Amata

E tele ni tuua'iga matuiā e ta'u ai le igoa o A'oga Amata i Niu Sila, e tusa ma se ripoti lata mai a le matagaluega o A'oga.

E iai le tulaga i le le lelei ona va'ava'ai, le le fafagaina o tamaiti, le so'ona pa'i, ua folasia uma i lumamea mo le silafia.

E 339 le aofa'i o faameo na to'ai i le matagaluega i le tausaga na se'i mavae, e 297 na su'esu'eina ae 42 e le'i manao'mia ni su'esu'ega. I le iuga e 166 mataupu na faamaonia, e iai ma isi e moomia ai se faaleleia.

O nisi ia o mataupu sa su'esu'eina: Molia se faia'oga i le soona mulu o se tama ua gau ai lona tau'au.

Taunuu i leoleo le tagi a se matua i se pepe ua soona lulu i se ofaga e tausai ai fanau. Na molia le faia'oga ma faasala.

Tuua'iga i le faamalosi ona fafaga tamaiti ae le o fia aai.

Faamalolo se faia'oga i le sau e faigaluega a o loo faasua'avā.

Tuli se faia'oga ina ua nofo ma se'i ese le nofoa, pa'u ai i lalo le tama.

Ave ese e le matagaluega laisene o ni tautua se 9, faamalolo se 6, ae sui le 31 i le tulaga vaavaaia, e faavae i faitioga mai matua ma isi.

Saunoa se sui o le matagaluega e le tatau ona

faailoaina igoa o tautua ma i latou ua aafia i faasalaga e mafua mai ai.

O le tele o faameo e aofia i mataupu e aafia ai le saogalemu o fanau, le tulaga o galuega ma lona va'aiga, le pulega i lalo o ta'ita'i ma faia'oga, atoa ma le gagana e fa'aogaina.

O se tasi o mataupu iloga o lena i se tautua na tapunia faaletumau ina ua oti se tama sa tausai ai i le aso.

O le tasi na semanu e tupu ai se faalavelave ina ua pe'a se tama i



Se tasi a'oga i Peretania o loo fai le lotu o mea'ai. Pei lava o se umu puou ma le miti.

totonu o se loka teumea ma mau ai. Na vave ona iloa ma faasaoina ai.

Ui lava i nei, a ua na o sina pasene o le aofa'i, pe a faatusatusa i le 97 pasene o loo iai i le lisi o tautua ta'uleleia.

E manatu Lyna Stuart o le NZEI e tele le sootaga o nei mataupu ma le le 'a'u o le faasoa tauseleni, e mafua ai ona aafia le galuega a faia'oga.

Ae na te lagolagoina le lipoti ma lona taua i le faailoaina o fili o le galuega. O na e faalelei ai le aga i luma.

Faasoa o le Vaiaso: Levi Tavita

E tatau ona lagonaina le vala'au a le fanau mo se fesoasoani

O se afiafi o lenei vaiaso, i luga o le TV3, e talanoaina ai le mataupu o le Addiction, e lana polokalame, Project.

E leai sa tatou upu e soaina ai a ua silafia lona uiga. E mafai ona faapea o se masani ua le mafai ona tuu pe tineia, aemaise pe afai o se amio e le lelei i le ola maloloina o se tagata.

Ola maloloina e le na o le tino e faatatau i ai a o le mafaufau atoa ma le agaga.

E fesoota'i na faiā e tolu, a aafia le tasi e aafia foi ma le isi lua.

O se faata'ita'iga faigofie, e iai e 'e atua i le pia, ma ua laasia le tulaga ua le mafai ona tuu, tainane fai mai le tino ua lava. E afaina le tino e ala i totoga ma neura o le fai'ai e tau i ai, le mafaufau ma le agaga e ala i filifiliga tauleamio ma le musumusuga a le lotofuatiifo e faasala mai.

Fai mai le loto e tuu loa ae le iloa pe faapefea ona fai. Ua malosi le finau mai a le mana'o ua pulea le tolu.

O i latou ua pulea e se mana'o, ua faalagolago i ai o latou ola, a ua tatou iloa o se faalagolagomaga sese, ma e fetau i ai le upu, o se tasi ua ma'i. Ua mana'omia se foma'i.

E le ese ma le na te fa'aoga se pauta faasaina, ua iai le lagona e lafoa'i a ua leiloa pe faapefea. Talu ai ua ova le faalagolago i le pauta, ua le faigofie ai ona tula'i ma sola ese. Pe sola foi mo sina taimi, ae le masola. Auā o le mana'o e galue i le mafaufau ua faia'ina i le tauiviga ma le tino. O le tele o mana'o faaletagata e faaletino, o le auala foi lea e ui mai ai le fili, o le tino, e ala i sulu e lima o le tino.

O se tasi faata'ita'iga faigofie o le tapaa. O se tu masani i le to'atele, ae iloa gofie le tagata ua pulea e le tapaa i le aofa'i o pusa tapaa e faatau i le vaiaso. Aso a o taugofie, e iai se tina e le atoa se aso e ula ai se pusa e tasi.

Ua maliu sea tina ona o le kanesa e mafua i le tapaa.

E iai le taofi a mea na'o tapaa ma pia e lavea i le lisi o 'Masani Leaga.' Faamanatu mai foma'i e leai. E tele foi mana'o lelei e au ina liua ma leaga pe a soona fai. Faata'ita'iga lata mai o taumafa. Mea taumafa o se tali i le mana'oga aupito taua o le tino, a ua afaina ai foi ma maliliu le to'atele ona o le soona tagofia. E moni le faamanatu a le Poto, E le lelei pe a soona 'ai i le meli (Faataoto 25.27). Tainane se mea lelei ae a soona fai, e iu ina afaina ai foi.



E le leaga le matamata o fanau i le TV, ae afai e pulea e le TV i latou ona soli foi lea o le tuaoi 'tatau', ma alu ai i le ave a ma ni e faapologaina ai.

Pe soona faaalu le taimi e faitau tusi ma su'esu'e, pe pupū le loto i le galuega ma tiute, ma pulea ai e lona pupū ma na mana'oga i tatou faapei o ni pologa. O se ma'i foi lea mea i le faitau faafomai o le mafaufau.

E le tau faailoaina le pule a le telefoni omiomi i nei aso i taimi ma olaga o fanau ma le lalolagi. O tatou uma o pologa a le telefoni.

Fai mai le su'esu'ega sa faailoa i le vaiaso ua tuana'i, e 56 pasene o fanau a'oga i iunivesite ma politeki ua afaina o latou ola maloloina.

Ae tusa i molimau o nisi su'esu'ega na muamua, e iloga le afaina i fanau Maori ma le Pasefika, pe a fua i le faitau aofa'i o Niu Sila.

O le fesili e le 'alofia, Aisea? O le tali faigofie, o le lagona omia e mafua i uiga ma mana'oga o se si'osi'omga fou ma ese. E le o se mea faigofie mo nisi fanau le ulufale i se iunivesite. Pe manatu matua a aulia e fanau sea tapulaa ona faapea lea ua lelei mea uma. Ae leai, e sili ona oia le laau i le tumutumu e pei o le muagagana.

O le taua lea o le tautua e fai mo fanau i totonu o se a'oga maualuga. Atoa foi le sao atu o nisi i le lalolagi o taleni ma taaloga.

A tulimata'i faamau o e ulufale ma toe faamaamulu, e tu mati'e Pasefika i lea vaega. E ta'u mai ai le le faigofie i le to'atele o fanau ona faafetaui lu'i o lea si'osi'omaga.

A mamafa le avega a le mafaufau ona faatupuma'i lea, ma alu ai saili toomaga nisi i le pia ma vailaau faasaina.

O le fesili taua mo le minisita ma le malo, e aga'i i se faatupega lelei o tautua o loo fitaituga ma le avega o fanau ua afaina. Poo maua e i latou le fesoasoani anoa ma aupito lelei e tusa ma le mana'o.

Ua tatou iai ma soifua i se vaitaimi o fe'oma'iga i le tino le mafaufau ma le agaga. Ua le masino mana'oga e

fananau faatasi mai ma le atamai faatekonolosi e lagolagoina.

O le faafitauli muamua i tekonolosi o la latou faamuamua i mana'oga o le tino, saunoa se alii foma'i. E taliina ai mana'o a le va'ai, ma isi sulu o le tino ma le mafaufau. Ae faaleai ni tekonolosi e talimana'o i le agaga ma ona faafitauli taligata.

E le tio i le fanau pe a manatu i lenei osofa'iga mai soo se itu i o latou ola maloloina. E tau mai luma ma tua le vaai pea lava pea i faatosina o oloa faatau. O mea'ai suka i faleoloa, o pauta faasaina e faatau e le tua'oi, o le uiga faailogalanu e faaali i potua'oga, o se avega lava e gata ai.

O le mataupu i vailaau faasaina e le vave ona mou ese, ma e le laitiiti le popolega. Auā ua iloa atu lona mata'utia o se malosiaga e lepetia aiga ma mafutaga.

O le popolega i leoleo o le taimi e taugofie ai pauta faasaina i lo le pia, ma e le pine le faasaga atu i ai o tupulaga. O lea ua talanoa i le faatagaina o le mariuana ma e le tauilo gata foliga o ni lu'i ua ata mai mo aiga i ni taimi o i luma, pe a alu ai faataga e le tulafono.

Toe foi i le 'auga o le faasoa, o iai mana'o lelei ma na e faale lelei. E o faatasi ma a tatou tu masani. A masani ai i se tu ona ave a lea ma se mea e pa'u a'i, ma au ina pologa ai.

O le fautuaga a foma'i, ia mataala i ai, ma saili le paleni moomia.


Mo se tu e afaina ai, e tatau ona saili togafiti ina ia faasaina mai ai.

Mo le fanau, a vave ona faamasani i se tu lelei, e faigata ona ia toe lafoa'i. Soo se masani— lelei pe leaga, e pipii mau, o le ala lea e faigata ai ona toese ma lafoa'i.

E moni lava le upu a le Tusi, a'oa'o le tama a o laitiiti, auā a matua e le toe te'a ese ai.

"mafaufauga o le vaiaso"

O le e tilotilo i fafo o loo miti, a o le e tilotilo i totonu, o loo ala. *Cark Jung, foma'i Siamani*



22-28 IULAI

22

1936 Taliu i fanua faaunuu a Taisi Nelesoni

1968 Lisi fanua Asau i le Potlatch

1884 Faalava'au i Mulinuu se tane, Tutuila, pule a konesula e toatolu

23

1930 Auina se tusi faameo Mau a Tina i le malo Niu Sila i le faaiuga Aso Toona'i pogisa

1993 Malo Jimmy Thunder fusi WBF o fusuaga

24

1975 Malo Monty Betham i le fusi o le paga tutotonu a malo Peretania

25

1935 Tofia Tanapulu i le tulaga o le sui Faatonu o le malo

1952 Amata pu'ega o le ata Return to Paradise i Samoa i Lefaga ma isi nofoaga; i le tala a James Michener

1956 Tatala le faletusi Uesile i Apia

26

1880 Tofi le tumua o Palauli tete'e Faasaleleaga ma Saleaula

1893 Auina Mataafa Iosefo ma isi e faaunuu i Jaluit i le Atu Maresala

27

1999 Pu'eina Leafa Vitale maliu o le minisita

28

1927 Faaofi teuteuga tulafono Samoa i le palemene Niu Sila

1982 Lau iuga Fono Mauuluga Peretania ofoina sitiseni Niu Sila i e na fananau 1924-1948 ma a latou fanau



U

A ATOA AI le 66 tausaga talu ona tafana e Keli Kupa le malumalu tapua'i o Lefaga, fau lona fale i le Aso Sa ma tausasa tagata i se laupapa, a o loo soifua pea le to'atele

latou te manatua; aemaise e sa lotolotoi ai i le faiga. E iai le tamaitai o Moira MacDonald-Walker sa fai ma afafine o Keli Kupa (Captain Morgan) i le ata; le alii faia'oga o Leulu Felise Vaa, ma isi ua tuua le mafutaga e iai Le Mamea Matatumua Ata, Herbert Ah Sue ma Hans Kruse. Ae sili ai, o loo maimoaina pea e le lalolagi le ata ma saga faalauiloa ai Samoa i nei augatupulaga.

A ua atoa ai le 36 tausaga talu ona to le pule a le Faamasinoga Mauuluga Peretania na semanu e avea ai se vaega to'atele o Samoa ma ni tagatanuu moni o Niu Sila. Peita'i ua silafia le tala, na faalavelave le malo o Niu Sila na mafua ai ona faapafala le iuga ma tamau ai i se feagaiga e taofia ai. Sa taumafai nisi e toe lalaga ae foliga ua siliga tali i seu se avanoa e sui ai le finagalo o Niu Sila. Atoa foi, e le lagolagoina e le malo Samoa sea taumafaiga.

O nisi o faamau uiga ese o le vaiaso o lena i le tausaga 1884, 134 tausaga ua te'a, na faalava'au ai (faatautau) ni pagota se to'atolu i le malae i Ti'afau i Mulinuu. Muamua se fitafita Aleipata i le aso 18 Iulai, pito le tasi e suafa ia Tutuila i le aso 22. O le molimau vaaia i lea mea o le alii faamauupu o Te'o Tuvale. Ua le maua atoatoa le mafuaaga ae atonu e matuia ni moliaga fua ina faatautau i le malae o faautugatagi. O ausiga mata'ina, o na i le faipele na ausia ai e ni alii Samoa e to'alua le tumutumu, ta'u ai Samoa.

Iulai i le Tala Faasolo o Niu Sila



22 Iulai 1987. Amata le Lotto a Niu Sila i le \$360,000

23 Iulai 1851. Goto le vaa Maria i le Tolotolo o Terawhiti, 26 maliliu

25 Iulai 1981. Solo tete'e i Hamilitone taaloga Springboks ma le All Blacks

28 Iulai 1893. Avatu talosaga tamaitai i le palemene e fia palota 26,000 saina

NIUPAC PUBLICATION

Email: evaleon.books@gmail.com

Phone: (03) 382-6674

Postal: 39 Basingstoke Street, Aranui, Christchurch 8061

All rights reserved. This bulletin and its content is protected by copyright laws of New Zealand and international conventions. Except for educational purposes, any other activity pertaining to its use is prohibited. OLA understands the rights of other copyright holders whose material we use and acknowledge always—apart from our own.

Editor:

Levi Tavita, MPS, BTheol, BA, Grad Dip Tchg
ltavita8@gmail.com

Reporters:

Saili Aukuso, MA, BEd, DipTESL, DipTchg
saili.niupac@gmail.com

Vavao Fetui, MA, BEd, DipTESL, DipTchg
ola.niupac@gmail.com

Photographer: Fili Fuaava

EVALEON BOOKS & NIUPAC PUBLISHING


Telefoni (03) 382-6674. Tuatusi meliE: evaleon.books@gmail.com



Sponsors:


Evaleon Books & Niupac Publishing

Tautua e ala i le gaosia o alaga'oa mo a'oga (tusi mo le a'oa'oina o le faitau i le gagana Samoa, tusi e a'oa'o ai gagana, kalena, posters, yearbooks, brochures). E tautua fo'i i le fa'aliliuga o gagana, ma le tapenaina o ni tusi e fia lomina i so'o se sionara o fatuga.



TAALOGA PASO SAMOA ~ GAGANA E LUA

1. Faatumu le pusa i upu/igoa Samoa poo se tasi e faatonuina. Fill the grid with the Samoan equivalents or any other as directed.



LPSTavita 2018 Copyright


ACROSS

- 1. prayer (6)
- 4. pungent (4)
- 8. long (pl.) (4)
- 9. ringing (6)
- 11. maybe (2,4)
- 12. his/ her (4)
- 14. while (2)
- 15. When (past) (6)
- 19. capital of Samoa (4)
- 22. riches (2)
- 24. dolphin(s) (5)
- 27. prepare (5)
- 28. medicine (3)
- 29. Samoan for the frigate bird (5)
- 30. flap of wings (5)
- 16. of little importance, minor (3)
- 17. lie face down (3)
- 18. obvious, clear by the evidence (2)
- 20. powder (5)
- 21. be overtaken by daylight (5)
- 23. Asian continent (4)
- 24. chicken (3)
- 25. first place race (3)
- 26. Samoan for Eve (3)

DOWN

- 1. city (7)
- 2. man (7)
- 3. a fish name (2)
- 5. be drawn to (attention) (5)
- 6. to send (5)
- 7. weather (3)
- 10. pick up sth (4)
- 12. now (3)
- 13. in case (3)

Tusi e fesoasoani:



Solution ~ Tali



Laufatu Samoa: O se tala faasolo

O le peleti o Alifi



E \$110 Samoa le peleti o le faife’au o Alifi; e taugata ai lona peleue na lafo mai Niu Sila i lona tuafafine. E taugata ai lana uati na sau ma lona uso i Amerika. E taugata ai le tele o meafale o la laua faaipoipoga o loo teu ai le maota o le galuega. A faatusatusa i isi ona uso faigaluega, e faatoluina ona faato’ā maua lea le peleti o lana uo o Vaega, e faifeau i le motu tele.

Talu ina avea ia ma faafeagaiga a le nuu o Vaiola, atoa nei se tolu masina, ua masani ai lana faalogo i Aso Sa o le peleti, e \$110 lava le aofa’i. E le sili a’e, e le itiiti ifo. Pe faapea foi e oo i se Aso Sa sili a’e i se tālā poo ni sene. E leai. O lena aofa’i e le suia tusa pe tusipepa le ‘afa o le peleti. O faamaumauga na i le api, auā e iai le matāfale e tusipepa faalausosoo le \$30, lona uiga na o le \$80 le tinoitupe moni e tuu atu e le failautusi i lona lima. A o le matāfale lea e to’a’aga e fagogota, e le misi le vaiaso ma ni i’a poo ni figota, atoa ma ni meamata e tausii ai le faafeagaiga ma le aiga. A faaliliu nei mea i ni tupe e mautinoa e sili mamao a’e i le \$110. I nisi taimi ua tolu ni tusipepa ona faapea lava lea ona fesuia’i numera. Ae a tolaulau e le failautusi i lona leo pāū ma oolo, e \$110 lava le aofa’i. A o lei saunoa mai, a ua femusua’i teine talavou o le aufaipese, ‘ai foi o le pese e 110.’

Se’i vaganā lava ni aso faapitoa o maliu poo ni faaipoipoga ona sui lea. O aso ia e malaga mai ai aiga mai nuu mamao ma tupe ma faapea ona maua ai se faasiliga feoloolo.

Ae tasi le ala o lona agaga faafetai, o iai se tinoitupe e fai ai mea o le a’oga a le laua fanau. I nisi taimi e mana’omia le foma’i pe a mama’i, e tataua ona faapaupau le ‘ato auā tulaga ia. O nisi mea i tua atu, e le popole i ai. Pe asiasi ane le ta’ita’i o le matagaluega, pe tutu faafuase’i ni a la uo poo aiga, poo ni tofi, o lana tulafono, o le mea ua maua, o lena e fai ai.

Na vave ona tuufaavasega e le faifeau le tulaga o mea. Ua masani o ia i le faavasega auā o lona tusi lea mai le Iunivesite a Samoa. O ia le potu faapitoa i mea tau le tamaoaiga. Muamua le tamaoaiga o le aulotu; e leai ni tagata faigaluega. E faamoemoe aiga i fua o faato’aga e faatau atu se vaega ma auala ai le faaso o le vaiaso. E masani ona talanoa le ‘aumatutua i aso a o la’u le fa’i ma le popo ma le koko i maketi i fafo. Ae iloa e le faife’au ua o se faanoi mo nisi e le to’a’aga e galulue. Ua mua le faalagolago i fanau o loo galulue i fafo. E ono matāfale e lavea uma i le ta’u o ni aiga tauatia’e; e faamoemoe uma i le alofa o tamafanau o loo tautua mai Niu Sila ma isi nuu o le lalolagi.

Ona tilotilo lea i puna o alamanuia lata mai. O Samoa lava ia o fanua. Ua uma ona ia asa tuamaota o le afioaga; ma faamalieina lona loto i le lafulemu o le eleele ma folafolaga lelei e aliali mai ai. Ua fesoloa’i neura o lona mafaufau i mea sa a’oa’oina ai; ua ia iloa atu se ata lelei faalemafaufau. Ua ia manatua le upu a lona tamā e masani ona fai, ‘Vaai outou, tou te le tau o mamao e saili le manuia o lo tatou aiga; na ona susu’e lava i luga o le vao maua uma mea na tou te manana’o ai.’

E to’alua ona uso ma le tuafafine ua o mamao e su’e manuia i nuu o papalagi. Na o le tuafafine e fai ma manatu mai i le aiga, a o ona uso ua seasea talanoa mai. E sa’o le upu a lona tamā, e le tau o mamao. O le iuga lea, e o atu ma leiloloa ai. O iai fanua a ua leai ni tagata e galuea’iina. Sa fai i ai sana lauga i le mafutaga a autalavou a le nuu. O lana matua, O manuia o le Atua o loo i lalo o lou fofoga ma lo’u isu, e te le tau alu mamao.

I lenei taeao sa mafaufau toto’a i ai. I lona tulaga o se auauna a le Alii, e iai le itu faaleagaga i soo se fe’au. E pei o le fesili pe aisea ua tofia ai i la’ua ma le to’alua e galulue i lenei aulotu to’agaogao toe mamao. E iai le pogai; o se misiterio ua na o le Alii na te silafia; Afai e silafia e ia, e le pine o lona finagalo foi lea.

O ananafi na fai ai ni saofa’i i le nuu tua’oi, sa mana’omia lana fesoasoani i le faapa’iaga o nofo. Na maua ai lona inati, o ie e lua ma le teutusi e \$100. E fetau lona tepa a’e ma le ma’alo ane o le ata o se tagata i lumāfale; o le failautusi a le aulotu. O loo aga’i tonu mai i le maota o le galuega. *Faaauau i le vaiaso fou.*

O ni tupua mo tamaiti:

- 1. O le aiga a uma ona aai ona o uma lea e ta’e’ele.
- 2. O le nuu e nonofo i se kolone.



PASI ATU LA TATOU PULETINI I LE TOU A'OGA, AIGA, LOU TUAOI, AU UO, E AOGĀ MO LE FANAU A'OGA



Igoa: Carl Jung
Aso Fanau: 26 Iulai 1875
Ausiga: I lona tulaga o se foma'i su'esu'e i ma'i taulemafaufau
Fetu: Leo

Mo i latou e silafia le suafa, e le tau faamatalaina lona sao i le faiva o su'esu'ega i ma'i o le fai'ai (mafaufau). Ae le gata ai i lena, auā o ona taofi ma mafaufauga ua faatamaoigaina ai isi faiva e iai le faafoma'i, su'esu'ega i aga a le mafaufau, le amio, e oo lava i le lotu ma le sootaga o tagata i tu faataulaitu. I le mataupu i le mafaufau ma lona atina'e (DPs), e iloa Jung (yung) i ana konesepi; e iai lena aupito lauiloa, e faamatala ai ituaiga e lua o tagata. I latou e ola i totonu o latou mafaufau, ma isi e taula'i i fafo la latou vaai. O i latou e vaai i fafo e maua lo latou malosi ma le faaoloaga i galuega ma mafutaga ma isi. O na e ola i totonu e saili malosi i manatu ma taofi taulemafaufau na o latou. O le tasi e fiafia i le mafuta soo, o le isi e taua le anoa o se mafutaga. O le tasi e tilotilo i le umi ma le lautele, o le isi i le loloto. E ui i lena e taofi Jung e itugalua le tagata; e na te mafai ona atina'e faatasi, o le sini ia 'aua ona tele i totonu ae galo fafo; pe tele foi fafo ae lafoa'i totonu. E fa galuega taulemafaufau: na te mamate sulu o le tino (sensation), lagona (feeling), mafaufau (thinking), sulu o le mau (intuition). O le tasi vaega taua o ana su'esu'ega o lena i le itu o le mafaufau e le oo iai se malamalama; ae mautinoa le sootaga o lena itu ma le vao mea lilo e aliali mai e ala i miti ma faali'a. Peisea'i e iai se sootaga o le mau a Jung ma a tatou talitonuga i le moe ma le tofa.

ATI A'E UPU:
upuia (v) faia ni upu poo ni tala e faasaga i se tagata poo se mea e fai. Ft., Se'i fai sa tatou lafoga ma le upuia soo o tatou.
upuese (v) fai ni upu ma le faamoemoe e faasese ai le mea moni; ave ni upu sese i se tasi e faatatau i se isi.
upusii (n) o se fuitau o upu e sii mai i se tusi.

Tulimanu o Pola:

Lu'itau o le fe'au ma tupua a tamaiti



Faafetai i le Atua ina ua alofa fua, lona alofa ua tumau e le liu e faavavau. O upu o le pese lotu e si'i ai la tatou mua i le Faia'oga Sili, o lo latou Alii ma le Atua foi.

Talitonu sa maua e outou le fanau ma susuga foi se faiga malologa filemu i le tu'uaga. O se manavaga moomia pe a manatu i le mau lu'itau o loo feagai ma le faiva i lenei vaitaimi. E le tio i nisi o susuga ua faailoa le augata e fa'aaauu pe a fua i le tiute ma le le 'a'u o le faasoa seleni, aemaise Aukilani. Sa faapea e ave le faamuamua a le malo i faia'oga, i lana faatauga fale. Mafua lo'u fai atu auā a leai ni faia'oga ua leai ni a'oga. O isi fanau ua matua i faia'oga auā e le maua matua i le fale. Tasi lea itu malie, e iai fanau e le mafaatali se'i a'e le a'oga ae o ese ma le fale. Aemaise lava nai fanau o loo iai i se si'osi'omaga lamatia o fuala'au faasaina poo vesiga faaleulugalii i le va o matua.

E taunuu atu le moliga o se tama a'oga i lona aiga a o loo ua leaga faia mai ona matua i ni mealele, toe fo'i mai lea o e sa o e momoli fai le lipoti i leoleo. O se tasi lea tala i se lipoti o mea o loo tutupu. O āuga lava o le pule a le mana'o, e le popole i le fanau ae savali e saili le mea e maua ai se pauta. E mafua ai le osofa'i o le dairy ma faaoo manu'a.

O le lipoti lea i le lotoifale o ofaga e tausii ai fanau ma lotoa faamasani e malie foi. O se faia'oga sa usu fiafia atu ma sana pea manaia, ae faafetaui mai e lu'i o le aso e vave ai ona musu. Aumai tamaiti e le'i suia napekini, eleelea foliga. O ai e oso se fia pese i le taeao. Pau lea o le se'i o le nofoa pe solo oomi ona mata i se fasi ieie. Fai fua ia ae o tiute na o matua.

Ou te manatua se vasega laiti Maori na ou vaaia. Fai atu le tauvala'auga a ua amata ona fetamoea'i. Fiu e fai atu ae fai lava latou. O le 'afu, o le tuu loa e fai latou, se'ia vaivai lava, ona feiti lea.

Ua ou fiafia ua fai se tatou tala faasolo. O le peleti o le alofa lea o le faifeau e ta'u ai e se tasi ekalesia. I o matou taimi a o laiti i Samoa e fai alofa i fasimoli ma kalasini. E lau uma lava na mea e le failautusi. Mao la ae toe fai i nei aso. E soo le facebook. . .

Sa ou taumafai e mate tupua a tamaiti. O le nuu e nonofo i se kolone, ou te le iloa. Sa ou faapea o le kalone, a o lea ua manino o le kolone. Ou te fia fesili lava i le palemia a Samoa pe le o le kolone lea o loo faatamā ai. Ia, masalo.

Manaia foi le faasoa i le alii foma'i o Jung. E eseese fausaga o tagata, e lelei ona malamalama ai. Tatou te faafetaia le Atua Foafoa auā 'ana tutusa uma tagata pei o Trump, lona uiga ua le toe iai se lalolagi.

A ia manuia lava le vaiaso ma tiute. Soifua.

